

Atentatua Madrilen

Euskal alderdiek gaitzetsi egin dute erabat Madrileko atentatua

Gertatutakoak «Gobernu sendoaren premia» indartzen duela dio Jauregik

Euskal alderdi politikoek ETArri egotzitako atentatua gaitzetsi egin zuten atzo. «ETak bere ahulezia» erakutsi duen unean irtenbide poliziala bultzatzearen beharra azaldu zuen PSE-EEk. EAJk «erradikalismo integrista» gisa definitu zituen egileak.

BILBO

Ramon Jauregiren ustez atentatua «historiaren orri beltz hau amaitu nahi ez duten lau fanatikoren gauza» izan da. Burukide sozialistaren aburuz oraingoan ETak bere existentzia erakutsi nahi izan du. Bere ustez, emaitzak beste batzuk izan dira. «ETak bere ahulezia eta kontraesanak erakustea lortu du» esan zuen.

Burukide sozialistak gobernu koalizioa osatzeko eginiko harremanez mintzatzea saihestu zuen. Hala ere, Madrileko atentatuak «gobernu sendo eta trinkoen irudi eta premia» indartzen duela adierazi zuen PSE-EEko idazkari nagusiak. EAJk eta PSOEek «terrorismoaren kontrako borrokan harreman estuak daramatzagu hainbat urtetan, eta hau agerian geratu da ez bakarrik alderdi bien kasuan, baita Ajuria Eneko hitzarmeneta eta EAE eta Espainiako gobernuen artean ere» nabarmendu zuen Jauregik. Ildo berean gogorarazi zuen bi alderdiek «irakurketa bateratua» egiten dutela biolentziaren alorrean.

Jauregik jakitera eman zuen, bidenabar, Ajuria Eneko Mahaiako bilera izan daitekeela uda aurretik.

Ondorio politikoez galdetuta Jauregik bide polizialera jo zuen. «Basakeriak ez dauka erantzun politikorik, nahi dugun bakarra da egileak hainbat arinen harropatu eta epaileen esku utzi, berarek kondena ditzaten».

HAUTESKUNDE EMAITZEI ERANTZUNA

Euzko Alderdi Jeltzalearen aburuz Madrileko atentatua hauteskundeetan HBk lortutako emaitza txarren ETaren erantzuna izan da. Prentsa agiriaren EAJk ENAMen barruko balizko diferentziak aipatzen ditu. «Euskal Nazio Askapenerako Mugimenduan berrikusketa osoa plantaiatzen dutenei kontrajartzen zaizkie atentatu hau egin dutenak». Azken hauek —dio EAJk— «KASen egungo zuzendaritzak lagunduta, boto



Ajuria Eneko Ituneko alderdiak uda baino lehen bil daitezkeela esan du Jauregik.

OLALDE

✓ **EA:** «ETak erakusten duen arma eta autoritarismoaren aurrean, euskal gizartearen gehiengoak demokrazia eta konbibentzia bake-tsua aukeratu ditu».

galera ETaren atentatu ezari egotzi diote».

Jeltzaleen aburuz «radikalismo integristak edozein azterketa erabiltzen du, berdin lortu nahi dituen helburen aurka badoa ere, bere mugikortasun eza eta etorkizunari dion beldurrari eusteko». Une politiko garrantzitsuetan «ETak politika ulertzeko duen modu odoltsua» erakutsi

ohi duela dio jeltzaleen agiriak.

ETak atentatuak egiteko gaitasuna badaukala aitortu ondoren, jeltzaleek azaltzen dute beraien ustez «atzeraezineko egoeran» dagoela ETA.

BESTE GAITZESPEN BATZUK

Eusko Alkartasuna eta Euskal Ezkerrak ere Madrileko leherketak gaitzetsi zi-

tuzten. Eak nabarmentzen zuen «ETak erakusten duen arma eta autoritarismoaren aurrean, euskal gizartearen gehiengoak demokrazia eta konbibentzia bake-tsua aukeratu ditu».

PPk dei egin zien ETaren inguruei atentatuaren gaitzespena egin dezaten. Beste alderdiek bezala elakrtasuna adierazi zien kaltetuei.

UAren ustez atentatua egin dutenek ez dute inoren babesik «ez bere kide askorena, ez presoena ez are gutxiago euskal gizartearena ere».

Elkarri: «ETArri igorritako gutunak indar handiagoa hartzen du uneotan»

DONOSTIA

Elkarri elkarriketaren eta akordioaren aldeko giza mugimenduak «bere atsekabea» azaldu eta «sendotasunez ezetsi» ditu Madrilen izandako atentatuak.

Hori ez dela hala ere, nahikoa dio Elkarri-k atzo zabalduetako agiriaren: «Saminaren edo gaitzespenaren azalpena ez da nahikoa, beharrezkoa da herri honi eragiten dion indarkeria egoerari konponbide objektiboen bila urratsak ematea». Ildo horretan Elkarri-k uste du, «ETArri igorritako gutunak eta proposamenek, martxan dauden beste ekimen batzuekin batera, indar handiagoa hartzen dutela uneotan».

Elkarri-k gutun bat igorri zion joan den ekainaren lehenean ETA erakunde armatuari, elkarriketarako eta akordiorako bere proposamena aurkezteko, aipatu mugimenduak igandean ezagutzera eman zenez. Proposamenak «erantzuna merezi» duela dio Elkarri-k. «Ekimen honek eta azkenaldian gure mugimendua bultzatzen ari den beste batzuek ere elkarriketaren, akordioaren eta bakearen bidean aurrera egiteko balioko dutela espero dugu», azaltzen du.

Elkarri-k bakerako bere proiektua azaltzeaz gain, zenbait proposamen zehatz ere egiten dizkio ETArri aipatu gutunean. Euskal Herriak bizi duen gataz-

kan parte hartzen duten beste agente batzuegana ere jotzen ari dela, eta zeregin horren barruan sartzen dela ETArri zuzendutako gutuna dio. Asteburuan egindako batzarretan ekimen honen berri publiko egitea erabaki badu ere, Elkarri-k ez du ezagutzera eman idazkiaren eta egindako proposamenen edukia, «zuhur» jokatzearen.

Bestalde, Felipe Gonzalez Espainiako jarduneko presidenteari ere gutun bat igorriko diola iragarri du. Ekimen hauen helburua, «Euskal Herriarentzako elkarriketaren, akordioaren eta bakearen bidean urrats eraginkorrak ematea» da, Elkarri-k dioenez.

Barne Sailak ordaindu beharko dio begi bat galdu zuen bati

BILBO

Jaurilaritzako Barne sailak 10 milioi pezeta (500.000 libera) ordaindu beharko dio Celedonio B.G.ri EAEko Justiziako Auzitegi Nagusiak erabaki duenez. Epaia dioenez, ertzain batek gomazko pilota bat jaurti zion kalte-tuari eta ondorioz begi bat galdu zuen. Celedonio B.G.k manifestaldi baten parte hartu zuen ekintzak gertatu aurretik.

Auzitegi Nagusiak, lekukoen adierazpenak ezagutu ondoren, frogatuztat eman du ertzainen eskuhartzea manifestaldia bukatu ondoren gertatu zela. Horregatik Auzitegiak uste du Ertzaintzaren jokabidea lekuz kanpo zegoela eta beste jokabide bat erakutsi behar zuela.

Manifestaldia Transportes Colectivas enpresako kideek egin zuten, greban zeudenean, Jaurilaritzak Bilbon duen egoitzaren aurrean 1984. urteko azaroaren 5ean. Manifestariaren helburua autobusen zerbitzua Udalak onartzea zen, baina negoziatzioek ez zuten langileek espero zuten emaitzarik ekarri, eta orduan hasi ziren ekintza biolentoak Auzitegiak jakinarazi duenez.

Langile batzuen erantzuna indarrezkoa izan zen epaiaren arabera, eta segurtasun indarrek esku hartu zuten. Sakabana-tzean Celedoniok eta beste kide batzuek ihes egin zuten. Epaia arabera bi ertzain langile hauen atzetik atera ziren eta batek gomazko pilota bat jaurtiki zion Celedoniori, nahiz eta agenteen aurkako egoera larria izan ez.

Ekintza hauen ondorioz, Celedonio B.G.k begia galdu egin zuen. Gainera 300 egun egon zen lanik egiteko gauza ez zela, eta lanpostua galdu egin zuen.

Kontua Bilboko Argibideetarako 2. Epaitegira eraman zuten, baina diligentiak bertan behera geratu ziren Barne sailak ez zuelako ertzainaren izena eman nahi izan. Gainera 1989. urteko uztailaren 7an Barne sailak uko egin zion kalteordainak ordaintzeari. Administrazioaren jarrera honen aurrean, kaltetuek errekurtsioa aurkeztu zuen EAEko Auzitegi Nagusian, eta honen epaia langilearen aldekoa izan da.